

Urteko 3. Igandea (B)

LEHENENGO IRAKURGAIA

Ninivetarrek beren jokabide gaiztoetatik atzera egin zuten.

Jonas liburutik 3,1-5.10

Egun haietan, honela hitz egin zion berriro Jaunak Jonasi:

-. «Ea, zoaz Ninivera, hiri handi horretara, eta aldarrikatu bertan eman dizudan mezua».

Ninivera joan zen Jonas, Jaunak agindu bezala. Ninive hiria izugarri handia zen; hiru egun behar ziren alde batetik bestera zeharkatzeko. Sartu zen Jonas hirian barrena eta egun osoan ibili zen mezu hau aldarrikatuz:

-. «Berrogei egun barru erraustua izango da Ninive».

Ninivetarrek sinetsi egin zioten Jainkoari. Hala, baraualdi bat egitea erabaki zuten eta dolu-jantziz estali ziren, zahar eta gazte.

Ikusi zuen Jainkoak beren jokabide gaiztoetatik atzera egin zutena, eta damutu egin zen haiei egindako mehatxuaz eta ez zuen bete.

Jaunak esana.

SALMOA

Salmoa 24, 4-5ab. 6-7bc. 8-9 (W.: 4a)

R

Azaldu niri, Jauna, zeure bideak.

Azaldu niri, Jauna, zeure bideak,
erakutsi ni nondik ibiltzea nahi duzun.

Zuzen nazazu, zurekiko leial izan nadin, irakats niri,
zu baitzara salbatzen nauen Jainkoa. **R.**

Ekarri gogora, Jauna, zeure errukia eta maitasuna:
betidanikoak dituzu.

Gogora nazazu zeure maitasunaz,

zure ontasunari dagokionez. **R.**

Ona eta zuzena da Jauna,
eta bidea jakinarazten die bekatariei.

Apalak zuzenbidetik daramatza,
bere bidea erakusten die apalei. **R.**

BIGARREN IRAKURGAIA

Mundu hau, orain ageri zaigun itxuran, desagertzeaz dago.

San Paulo Apostoluak Korintoarrei egindako lehenengo gutunetik 7, 29-31

Hau dio, senideok, epea laburtu egin dela diotsuet. Beraz, gelditzen zaigun denboran, ezkonduak bizi bidez ezkonduak ez baleude bezala; negar dagitenak, egingo ez balute bezala; pozik daudenak, ez baleude bezala; erosten dutenak, ezer ez balute bezala, eta mundu honetako gauzez baliatzen direnak, baliatuko ez balira bezala; mundu hau, orain ageri zaigun itxuran, desagertzeaz baitago.

Jaunak esana.

Aleluia Mk 1,15

Aleluia, aleluia.

Gaingan duzue Jainkoaren erregetza.

Bihozberri zaitezte eta sinetsi berri ona. Aleluia.

EBANJELIOA

Bihozberri zaitezte eta sinetsi berri ona.

+ Jesu Kristoren Ebanjelioa San Markosen liburutik 1, 14-20

Joan Bataiatzailea kartzelan sartu eta gero, Jesus Galileara etorri zen eta Jainkoaren berri ona hots egiten zuen.

Honela zioen:

- «Betea da garaia, eta gaingan duzue Jainkoaren erregetza. Bihozberri zaitezte eta sinetsi berri ona».

Jesusek, Galileako aintzira-bazterrean zehar zihoala, Simon eta honen anaia Andres ikusi zituen sareak uretara botatzen, arrantzaleak baitziren. Jesusek esan zien: «Zatozte nirekin eta giza arrantzale egingo zaituztet».

Haiek, besterik gabe, sareak utzi eta jarraitu egin zioten.

Aurreraxeago, Santiago eta Joan anaiak, Zebedeoren semeak, ikusi zituen; sare-konponketan ari ziren beren ontzian. Ikusi bezain laster, dei egin zien. Haiek, beren aita Zebedeo eta mutilak ontzian utzirik, Jesusen ondoren abiatu ziren.

Jaunak esana.

Blog: <https://homiliaspagola.blogspot.com/>